



**TERTIB ACARA KEBAKTIAN MINGGU  
GKPS P.BULAN-RESORT POLONIA MEDAN  
Minggu ESTOMIHI  
Sai Ham ma nagabe batat-batarhu  
14 Februari 2021**



**TOPIK: "JUAKJUAK NI TUHAN NA SATIA"**

**Live streaming: [www.gkpspadangbulan.com/tv](http://www.gkpspadangbulan.com/tv)**

**Tata Ibadah: <http://www.gkpspadangbulan.com/tatib>**

**1. Votum – Introitus – Tonggo**

**P :** Pasirsir hita ma dirinta laho mamuji pakon pasangpakon Tuhan in! Riap ma hita jongjong!

Ibagas Goranni Naibata Bapa, pakon Tuhan Jesus Kristus ampa Tonduy Na Pansing, Sitompa langit pakon tanoh on. Amen.

Jahowa do gogohku pakon gantarhu, hu Bani do mangarap uhuru gabe iurupi do ahu. Halani ai marlob-olob do uhuru, anjaha hupuji ma la marhitei dodingku. Jahowa do pargogoh bani bangsa-Ni, anjaha batat-batar hatuahon do la bani na mininakan-Ni. Haleluya, haleluya, haleluya.

**K :** Haleluya...haleluya...haleluya (idodingkon ).

**P : Martonggo ma hita!**

Ham Tuhan Naibata Bapa banami, paridob ni uhur simada kuasa. Domma iberehkon Ham Anak-Mu na sasada in gantihnamanaron na marsik, ronsi matei tarsilang laho paluahkon hanami. Rajai Ham ma uhurnami ase ibotoh hanami mangkargahon sitaronon-Mu in janah margogoh anjaha marsabar ni uhur hanami mandompakkon sitaronon pakon parlajuoan bani goluhnaman, halani Ham do batat-batarnami. Parmalaoi Ham ma hanami laho pasangpakon goran-Mu marhitei Anak-Mu Jesus Kristus Tuhannami. Amen.

*(Hundul Kuria).*

**2. Mandoding 406. Hatahononta Diatei Tupa ma (1-2)**

1. Hatahononta diatei tupa ma, ai Negaranta tanoh na lambut Laut bolag dologni pe ratah, talun jenges ampar do haganup In haganupan pasu-pasu-Ni, simada kuasa Tuhan Naibata In haganupan pasu-pasu-Ni , simada kuasa Tuhan Naibata

2. Sanggah poltak mataniari in, martitalas bai sogodni in, Morum mangerbang bunga-bunga in, irandu doding ni bossala in In haganupan pasu-pasu-Ni, simada kuasa Tuhan Naibata In haganupan pasu-pasu-Ni , simada kuasa Tuhan Naibata

**3. Hasasapan ni Dousa**

**P :** Riap ma hita jongjong!

Martonggo ma hita! Sopotkon hita ma dousanta hubani Tuhan Naibata.

Ham Tuhan Naibata, Simada sagala na adong, Sibotoh haganup anjaha Naibata Parpintor. Lajari Ham do hanami ase manghamalaskon pasu-pasu na dob ipaondos Ham hubannami. Tapi gati lang ihasonangkon hanami sibere-bere-Mu, janah iajamkon hanami do gogoh, pingkiran sonai age uhurnami sandiri, laho mansuhuni sura-surunami. Jajat na hurang podas do pangahapnami martambah sinadongan, gabe ipindahi hanami parhiteian na so tiba dalanni. Lang homa ipakei hanami panorang na binere-Mu in ibagas gok tanggung jawab. Gati do lolei hanami laho mangindahi Ham halani mampararak arta na laho salpu in. Ham Tuhan marpangulaki ma uhur-Mu mangidah ganup dousa pakon hajahatonnami in. Hartuki Ham ma uhurnami ase ulang inunut hanami be mangkorjahon dousa pakon ganup na jahat in. Topa Ham ma uhur na bayu marhitei Tonduy-Mu, ase tongtong hanami manggoluh ibagas hapintoron-Mu. Ibagas Kristus Jesus sipaluah in, sasap Ham ma dousanami anjaha jalo Ham ma tonggonami on. Amen

**P :** Tangar anjaha haporsayai hita ma Hata ni Naibata, bagah-bagah pasal hasasapon ni dousa: "Anggo marparlahou hita ibagas haliharon, songon la ibagas na liar in, saor do hita samah hita, anjaha ipaborsih daroh ni Jesus, Anak-Ni in do hita humbani sagala dousa"

Ibagas holong ni Naibata, domma isasap haganup dousanta. Halani ai, pataridahkon hita ma tanda-tanda ni pargoluhon na bayu. Hasangapon ma bani Naibata ibabou!

**K :** Amen.

*(hundul kuria)*

**4. Mandoding 137. Sadokah Jesuskin (1+3)**

1. Sadokah Jesuskin mangkasomani au Maporus holsoh-holsohkin, sai Bani mando au

2. Parmahan Jesuskin, biri-birini au  
Itogu-togu tonduyhin, seng be marmara au

5. Sai sol targompang au ai mahol dalam in  
Podas bai Jesus laho au patorsa langkahkin.

6. Hutonggor ma tongtong Jesusku, rupeihin  
Ai la tuah na tongtong na so marhinggan in

#### 5. **Hata haporsayaan**

P. Riap ma hita jongjong!

Saksihon hita ma haporsayaonta in, songon na sinaksihon ni haganup halak  
na porsaya bani sab tanoh on!

P+K. Ahu porsaya bani Naibata Bapa, Pargogoh na so tarimbang, na manompa  
langit pakon tanoh on. Ahu porsaya bani Jesus Kristus, Anak ni Naibata na  
sasada in, in do Tuhanta, na tinubuhkon ni si Maria sanggah nape haliaban,  
marhitei Tonduy Na Pansing. Na manaron na parngit, bani panorang ni si  
Pontius latus, iparsilangkon, matei anjaha itanom, turun hu nagori toruh.  
Mulak manggoluh humbani na matei bani ari patoluhon. Naik hu surga anjaha  
hundul i siamun ni Naibata Bapa, Pargogoh na so tarimbang in. Hunjai ma la  
mulak magira laho manguhumi halak na manggoluh pakon na dob matei.

Ahu porsaya bani Tonduy Na Pansing, bani kuria parsadaan ni namapansing in,  
bani hasasapan ni dousa, bani parpuhoon ni angkula, pakon bani hagoluhan na  
sadokah ni dokahni. Amen

#### 6. **Persembahan Pujian**

#### 7. **Tingting + Tonggo Pangapition**

#### 8. **Mandoding 382. Na Martidah bai Gok Iluh (1-2)**

1. Na martidah bai gok iluh, mangarapkon Tuhan in.  
Megah do use manabi, goluh na sonang totap.  
Hombun pakon mataniari na mambaen gabe toras.  
Ronsi rundut ganup buyur buah na ramos toras.

2. Ai pe ulang hita lolei, manaburhon bonih in.  
Ase sanggah na manabi, megah uhurta ijin.  
Hombun pakon mataniari na mambaen gabe toras.  
Ronsi rundut ganup buyur buah na ramos toras

#### 9. **Ambilan: 2 Korintus 4: 1–6**

#### 10. **Manggalang:**

Paima iondoskon hita galanganta, tangar hita ma lobei hata ni Naibata na gabe  
onjolan banta laho manggalang, aima tarsurat bani: **Heber 13:16: “Mambahen  
na madear ampa na marsibere-bere, ulang ma halupahon nasiam ai, ai  
galangan na sonai do iharosuhkon Naibata”** .

**Sonari patumpu hita ma galanganta.**

*Diatei tupa ma  
sombahku hu Bamu Jesus  
Halani holong-Mu,  
Ham parsimada au*

#### **Ref:**

*Huboan hu Bamu, daging ‘pa tonduyhin  
Na gabe galangan, parsombahan Bamu  
Ai lang tarbahen au, na patut hu Bamu  
Ai pitah on Tuhan, na targalangkon au*

*Hupindo hu Bamu, sai holong atei-Mu  
Sai jalo Ham Tuhan, galanganku on  
Sai pake Ham ma au, gabe parugas-Mu  
Sadokah goluhkon*

#### 11. **Tonggo Galangan – Panutup :**

Martonggo ma hita mangondoskon galanganta hubani Naibata!

Ham Tuhan Naibata Bapanami, harohanni haganup. Hun Bamu do harohan  
ni pasu-pasu hu bannami. Ibere Ham do bannami goluh ampa hagoluhan ari-  
ari. Ham Tuhan, ijon iondoskon hanami ado hu Bamu goluh pakon pasu-pasu  
na dob binere-Mu in bannami. Sai lambin margogoh ma tongon hanami  
ihasomani idop ni uhur-Mu ampa pasu-pasu-Mu bani na mandalankon  
horjanami.papansing Ham ma galangan na ginalangkonnamami on gabe  
galangan na misbou i lobei-lobei-Mu, ase lambin ihargahon hanami tongon  
dear ni layak-Mu humbani gogoh, pingkiran ampa sinadongannami. Tarima  
kasih ma Bamu Tuhan. Marhitei Krsitus Tuhannami, jalo Ham ma galangan  
pakon tonggonami on. Amen.

**P+K: (mandodingkon Hal. No. 381:1) Ringgas Au Pararatkon**

Ringgas au pararatkon Hata-Ni Tuhan in,  
ronsi hasangapon-Ni, ge holong uhurNiin.  
Ambilan siharganan, Hata ni Tuhan in,  
pasonang paruhuran ampakon Tonduy in.  
Tongtong do marmulia barita ni Tuhanta,  
sai lambin tarambilan Goranni Tuhan in.

**P** : Ham Bapanami na i nagori atas. Sai na papansing ma goran-Mu. Sai roh ma harajaon-Mu. Sai saud ma harosuh ni uhur-Mu i nagori tongah on songon na i nagori atas. Bere Ham ma bannami sadari on hagoluhan ari-ari. Sasap Ham ma dousanami songon panasapnami bani dousa ni hasoman na mardousa dampak hanami. Ulang hanami bobai Ham hu parlajouan. Paluah Ham ma hanami humbani pangagou.

**K : (mandodingkon)** *Ai ham do simada harajaon, pakon hagogohon, ampa hasangapon, sadokah ni dokahni. Amen.*

**P** : Laho ma nasiam, janah: "Baritahon nasiam ma i tongah-tongah ni sipajuh begu-begu hamuliaon-Ni, i tongah-tongah ni bangsa-bangsa halongangan binahen-Ni ai."

**P : Jalo hita ma pasu-pasu humbani Tuhan Naibatanta:**

Ipasu-pasu anjaha iparorot Tuhan Naibata ma ham (hita). Isondangkon Tuhanta Naibata ma bohi-Ni hu bamu (hu banta) janah maidop ma uhur-Ni mangidah ham (hita). Idompakhon Tuhan Naibata ma bohi-Ni hu bamu (hu banta) janah ipasorap ma damei-Ni bani tonduymu (tonduytabei).

**K : Amen..... Amen ...Amen!**